



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 3

PML-N aser PPP nati Pakistan nung sorkar kumtetsü

India-Greece na shishilembaba anasü agi tali akümtsü: PM Modi



VOL. XXI ISSUE NO. 130 (ADOK 130) DIMAPUR YANGTEPNÜ (THURSDAY) TSÜKLAI (FEBRUARY) 22, 2024 ₹ 5.00

AKM & SKK-i Advisor Dr. Yhome dang telangzüba meshir

Dimapur, February 21, 2024 (Agencies): School Education & SCERT Advisor Dr Kekhrielhoulie Yhome-i February 6 nü angatetsü makokba sangdong ka agütsüba jangjashitsütsü ta metetdaksür ta Ao Students' Conference (AKM) aser Sumi Students' Union (SKK) ajanga shiogo.

Küm 10 tashi Ao aser Sema nung primary tesayurtem inyaksü meshimoktsü ta Advisor Yhome-i ashiba atema jangjatsütsü sangdong ka agütsü saka iba ajanga nisungtem tali ratadaksür ta AKM aser SKK-i ashi.

"Dr Yhome-i February 6, 2024

nü jembiba meyipa magiba atema pelar. Pai 'Issued in the Interest of Public Safety' ta ser sangdong agütsüba atema pai jangjashitsüla. Naga nung asoshi Ao aser Sumi nung dak lendong keta lir ta pai ashiba asü?" ta kaketshir teloktemi asüngdangogo.

Dr Yhome-i sangdong agütsüba nung amshia aliba oren nung taitüsü keta lir aser iba ama nisung kar kanga luja jembiba ya asen loktiliba nung magizüker, ta parnokisa asi.

Advisor Yhome-i pai jembiba onük meyipa magira onoki tapet mapa inyaksü ta AKM aser SKK-isa metetdaksüogo.

Naga yimten latettsü mapang atsülanger: Dr SC Jamir

Kohima, February 21, 2024 (Agencies): Naga yimten latettsü mapang atsülanger aruba atema melar ta taoba Nagaland chief minister Dr SC Jamir-i ashi.

"Prime Minister Narendra Modi aser taoba union home minister Rajnath Singh na lia August 3, 2015 nü NSCN-IM-i framework agreement nung sign sütep. Iba anogo parnok tsüngda mulungtepba onüktem agizükba tamaitüsü sayua salemtapa aser teka matena tenangzüka agitep" ta Dr. SC Jamir-i ashi.

"Iba anogo yimtenren tsütsübo tenangzüktep renema ayu anungji kechiba mapang atsülanger? Naga reconciliation senden nung ashiba ama framework agreement nung sovereignty mesüra integration

mali" ta pai ashi.

Framework agreement nung sign asür NSCN-IM-i wako, temzüng aser pei sasa ketdangtsütsü tamaitütem endoktsü nungnangtsü akok ta Dr. SC Jamir-isa shisem.

December 2023 nung parliamentary session agidang Union Home Minister Amit Shah-i Jammu & Kashmir nungi Arlla-370 agienba indang jembidang India nung Prime Minister ka, Constitution ta aser wako ka nenshia liasü ta pai metetdaksü.

"Ajak tejangja süra kechiba yamai menur" ta Dr. SC Jamir-isa shisem.

Paisa Nagaland nung Naga nung lanuputui Naga nüjiso atema inyaka aruba putiotsü meteta alitsü ayongzü.

NE nung tzünglu kanga arutsü; rü alatsü

Guwahati, February 21, 2024 (Agencies): February 21, 22 aser 23 anogotem Northeast state 8 nung tzünglu kanga arutsü ta India Meteorological Department (IMD)-i metetdaksüogo.

Bodbar (February 21) nungi Hokolbar (February 23) tashi Northeast India kübok tesem aika nung tzünglu terara arutsü, rü alatsü aser iba den tsüngi aitsü aser mopung aontsü ta IMD-i ashi.

February 21 aser 22

anogotem Arunachal Pradesh nung tzünglu kanga arutsü. Iba mapang tsüngda Arunachal tenemlen rü temelem alatsü ta parnokisa ash.

February 22 nü Assam, Meghalaya, Nagaland, Manipur, Mizoram aser Tripura nung tzünglu kanga arutsü.

Maneni, West Bengal aser Sikkim nunga February 22 tashi tzünglu terara arutsü, tsüngi aitsü aser mopung aontsü ta IMD-isa metetdaksü.

Karbi Anglong nung ali atsünga agirtem meindoktsü

Diphu, February 21, 2024 (Agencies): Professional Grazing Reserve (PGR) aser Village Grazing Reserve (VGR) nung alir ajak agentsü ta Karbi Anglong Autonomous Council (KAAC)-i metetdaksüogo.

KAAC Chief Executive Member (CEM) Tuliram Ronghang-i tang aser taoba autonomous council members, kaketshir lennirtem, telok balala aser political party tem den senden anaben amenba sülen iba osang metetdaksü.

West Karbi Anglong district nung taoba hopta PGR aser

VGR tesemtem nung ali atema mepetmesü adoka raratepdang nisung 7 yiruba aser 17 apuba ken o angatetteptsü atema senden amen.

Bodbar nungi tenzüka Karbi Anglong Autonomous Council (KAAC) kübok village grazing reserve (VGR) aser proposed grazing reserve (PGR) nung ozüng alema arua alirtem ajak aienshitsu atema sangdong agütsütsü ta CEM Ronghang-i ashi.

KAAC-i tenemlen lisopurtem teimba ser aliba district ana-Karbi Anglong aser West Karbi Anglong madak yimsü asür.

NSSB nung uniformed departments atema arishi küm atsülanger

Kohima, February 21, 2024 (Agencies): January 22, 2027 tashi nung arishi küm 38 majungertemi NSSB kübok mapa atema application agütsütetsü.

Nagaland sorkari January 22, 2024 nungi tenzüka Nagaland Staff Selection Board (NSSB) nungi sorkar mapa nung anioktsü atema küm asem ajemtsütsü.

Iba ajanga January 22, 2027

tashi nung arishi küm 38 majungertemi NSSB Regulations, 2020 nung Schedule 'A' nung Para 3 nung shia aliba sorkar department tem nung mapa balala atema tenüng agütsütsü akok.

Iba nung Department of Police, Prisons, Nagaland Lokayukta, Nagaland Police Telecommunication Organisation (NTPO), Home Guards & Civil Defence, Fire & Emergency

Services aser Excise nung Constable/Fire Constable/Warder/Female Warder (Pay Level-3) aser Environment Forest & Climate Change Department nung Forest Guard (Pay Level 5) dena lir.

Item Department temi P&AR, Home aser Finance Departments nungi züngsemtem dena pei pei Recruitment Boards tentetsü, ta Nagaland sorkari metetdaksüogo.

Assam assembly nung Healing Practices Bill benok

Guwahati, February 21, 2024 (Agencies): Bodbar nü Assam state assembly nung Assam Healing (Prevention of Evil) Practices Bill 2024 benokogo.

Iba bill ya Assam parliamentary affairs minister Pijush Hazarika-i benok aser pai ashiba agi bill ajanga sayatonya inyakyim ajanga taneptsü agütsüba aser talisa evangelism azioktsü atema lir.

Lendong aketba inyakyim nungi public health kümzüka

ayutsüba aser osang tali tejangba nung prokshitsü atema iba bill benoker. Assam nung tai maketba nisungtem non-scientific healing practices nungi jenbua lidaktsütsü aser iba inyakyim samatsütsü atema bill yanglu.

Assam Healing (Prevention of Evil) Practices Bill 2024 nung

Section 3 ajanga sorkari tashidak aser temang nung timtem kar atema 'evil or magical healing practices' noktangtsü tashi agütsür. Külen, Section 4 ajanga ibala inyakyim dak sendakba advertisements noktangtsü melar.

Section 5 nung sorkari ibala mapa inyakterem merenshitsu temeten agütsü aser Section 6 ajanga küm asem tashi tepuokdak ayutsü, Rs 50,000 senchi achitsü mesüra temerenshi anaprong agütsüsü melar.

Aiben aibelenertem küm 5 tashi tepuokdak mesüra Rs 1 lakh senchi mesüra temerenshi anaprong angutsü akok.

Iba bill nung Section 9 ajanga police ketdangsurtem vigilance officers ama mapa lemezüktsütsü aser Section 16 ajanga bangdakpurtemi bill nung aliba

onüktem asoshi inyakyim latettsü tashi agütsür.

Assam cabinet-i magical healing practices atema mapa kar inyaksü ta lemtetba sülen assembly nung iba bill enokogo.

Ajisüaka, Assam Christian Forum-ibo chief minister-i ashiba olen aitsüogo.

Sayatonya agi taneptsü anguba ya tamangba yimsü melendaktsütsü asoshi inyaker ta Assam CM Sarma-i ashibaji tiyazü aser shisa metongi jembiba lir ta Assam Christian Forum-i metetdaksüogo.

Taneptsü agütsüba ya tamangba yimsü tebandang kecha melii meimchir timtemba atema aria bilema inyakba mapa ka lir. Sarasadem asüba dang magical healing ta ajabaji aibelen tangatetba ka lir, ta parnokisa ashi.

Ali mekazüka kibur kümnüba tebilemtsü dak sentakba nung Lika puri kuli meshia Mkg DC dangi shiti ka zülü

Mokokchung, 21st Feb (TYO): Mokokchung town nung ali mekazüka kibur kümnüba tebilemtsü dak sentakba nung Lika Board-i Mokokchung Deputy Commissioner dangi tezüluba ka Feb 21, 2024 nü agütsüogo. Lika Board ya Mokokchung town akümba yim asem (3) - Mokokchung, Ungma aser Khensa yimtemi tentetba lir.

Parnoki züluba shiti koba osangbenertem nem agütsü, yangji shia aliba agi, akhi tsürabur mapang nungi Naga nung ali madak kibur akümba maparenji sobaliba tsüzüng ozüng aser yimsüyimbong dak ajemdaker putu ka nungi ka belentepa rereta benshia aruba tanü tashi yamaji arur.

Akhi tsürabur mapang nungi kimunglumongrongsen senmanga arubaji wazüka lir, kechiaser kinunger, kin kidong aser yim bangdak aser benshia aruba sobaliba inyakyim ajakji Naga nung ali nung kibur akümba dak sentaka lir.

Akhi mapang nungi, bendanger shinga nema ali kecha mesüra ali tila kata yoka maru,

tezüngzüktep kecha meyangu, lease nung mayu, kecha dena memelentep aser senpet magütsü. Shingai pei mulungka nung kidong li jurila ayoktsü memelar. Yamaji inyakra, pa nem tsürabur senmang aser temeten kecha magütsü kidong nungi jentok.

Nisung kari danga pei juri li/ kimunglumung ayoktsüsa kümra, mayok tsüngta mezüngbuba par anasaba kinungertem, mesüra kidong mesüra par yimer nem yimli agütsü, taginür tangar yimer liakasa kodanga yamaji meinyak, ta parnokisa ashi.

Iba ama Naga nung ali dak sentakba nung sashishashia benshia aruba mapang, tenangzüktep kecha meyui British nungeri 1889 nung Mokokchung district ya parnok indang litsü ta sangdong, British nungeri sepia tashi ulura asüji parnok ali tuluka agiatok, aser parnok kechisaren nung amokbangtsü tenzü.

British nungeri asen lima yimsü asüdag, parnok asenok nungi ali mekazüka par meyong ama amshiba yimyaji asenoki

onsara mabensai tongmelang agi "ali aliba" mesüra "ali ayokba" ta rateta aru. Anungji, iba mabensai tongmelang agi ratetba nungji ajemdaker lokti mesüra nisung kari parnok/nija ajangzüksü asoshi olemiyim melenshia amshitsüsa sapoka yutsür, ta parnokisa metetdaksü.

Land Records 1890 nungi 1990 tashi nung tatalokbatemji reprangdangra, 1889 nung Mokokchung subdivision station yanglutsü atema sorkari ali madak temeten mekazüksü senpak 100/- agi ali, iba dak sentakba nung kija aser telok balala aikati aliji British nungeri ket nungi angu ta jembir.

Anungji, tang ali dak sentakba nung shirnok densa keno metembang ali aser tarutsü nunga adoktsüsa lir, parnok indangji British nungeri o nijatem aser telok balala shirnokisa koba yim aser kidong dangsa kimung ali mesüra senpet angu, item kulitemji tezüluba nung tejangja aginür, ta Lika (Land Owners') Board mendenbuba, Imtisungkum Pongen aser tezülur, Imtikumzuk Longkumer tenati kuli süa metetdaksü.

IGNOU Kohima Centre kübok kaketshir 980 takok angu



Director, Higher Education, Dr. A. Nshoga aser IGNOU Regional Center Kohima nung kaketshirtem Capital Convention Center, Kohima nung February 20, 2024 nü 37 buba Convocation sentong alidang tangokba noksa nung angur.

Dimapur, Tsüklai/February 21 (TYO): 37 buba Indira Gandhi National Open University (IGNOU) Convocation sentong Capital Convention Center, Kohima nung February 20, 2024 nü agia liasü. Iba sentong nung Dr. A. Nshoga, Director, Higher Education Nagaland tesemdanger tongti liasü.

Dr. A. Nshoga-i iba sentong nung jembidang IGNOU Regional Center, Kohima nungi takok angur nem tenüngsang agütsü aser parnoki bendanga agütsür meranga azüngba ajanga academic tsütsü alizüng tongtet, ta ashi.

Pai kaketshirtem dang asüng atema milen abener ka-ka akumtsü ayongzük aser mapa tajung atema parnoki angazükba shisatsü amshitsü ajungshia liasü.

India nung aser bendang lima nung nisung million asem dak temai nüngdakba ama IGNOU ajanga shisaliok peria agütsür, ta

Dr. Nshoga-i ashi.

Tajemzükba jenjang nung alirtem, loktiliba-rongsenketzüng tsütsü jenjang tajung makartem, lemata-matartem aser tepuokdak alirtem nem higher education angazükdaksüba atema pai IGNOU nem tenüngsang agüja liasü.

Tesayuba, research, training, community development, extension activities aser professional development densema sector balala nung IGNOU-i shilem tajung agiba atema pelaba lemsatop.

National Education Policy (NEP) 2020 mesangdong dang nungi IGNOU-i Choice Based Credit System (CBCS) amshia arur, ta Dr. Nshoga-i ashi.

Tazüngtöpuri courses balala shimba nung atsü-anem akaba, par mapang nung course temdaksüba indanga pai ashi.

Dr. Mayonmi Shimray, Regional Director I/c of IGNOU

Kohima ajanga iba sentong nung tarur pela agizükba o jembi aser Kohima Regional Centre-i takok balala anguba indanga lemsatepa liasü.

Kohima Regional Centre nungi temsüa aliba kaketshir 989 nungi master degree agir 723, bachelor degree agir 122, diploma agir 88 aser certificates angur 47 lir, ta pai ashi.

IGNOU Kohima Regional Centre nungya 2001 küm tazüngser 32 liasü aser tangbo meyrirjang ter dak tema lir aser program balala agütsür, ta Dr. Shimray-i ashi.

Iba sentong nung tazünger nungi Ongnetchanger Longkumer, Hekhuli aser Shilpa Bhowmick nungeri tajangshibatem lemsatop aser Manini Moro-i temeja ken ka aten.

Maneni Assistant Registrar, IGNOU Kohima campus, Kh. Sushil Kumar-i melepzüng o jembia liasü.

UIDAI-i ayongzükä workshop ka agiogo

Dimapur, Tsüklai/February 21 (TYO): Unique Identification Authority of India (UIDAI) Regional Office, Guwahati-i ayongzükä "Recent Initiatives for Simplifying Aadhaar Usage" dak sendakba nung February 20 nü Kohima nung State Level Workshop ka ayongzükä agiogo.

Deputy Director General of UIDAI, Regional Office Guwahati Cmde Dhiraj Sareeni, Asdhaar ya nüburtem nem tashi agütsütsü atema hadir ka aser ajak ka kümdaksüba temaitsü ka lir, ta ashi. Paisa, Aadhaar nükjidongji nisungshia nem unique, verifiable identity ka agütsütsü asoshi lir aser sorkar mapa, subsidy aser tajangzüktem teküboktiba jenjang nung alirtem nem den agütsüba nung iba yagi tongtibang shilem agir, ta ashi. Paisa, state nung nüburtem tali

anisingzükä lidaktsütsü atema UIDAI-i maneni Nagaland nongita yaritsü tenangzükba agüja liasü.

Sentong nung tongti tejaoker, Abhijit Sinha, IAS, Home Commissioner-i, temsüa aliba beneficiary tem nem Direct Benefit Transfer (DBT) schemes agütsüba mapang Aadhaar indang shilem metetdaksü. Paisa, Aadhaar Enabled Payment System (AePS) benokba sülen mapa ajak ochishia inyaka otetdar, ta ashi.

Kasa mapang nung Col. Abhishek Koushik, Director-i, Nodal Department-i (Office of the Commissioner) mapa tajung benoka inyakba atema parnok nem tenüngsang agütsü. Directorate of Land Records, Government of Assam-i, "Authentication" dak sendakba nung takok balala anguba

indang lemsatop.

Maneni UIDAI Head Office, DBT Mission, aser NPCI nungi ketdangsürtemi Aadhaar amshiyim dak sendakba nung osang tejangja agüja liasü. Parnoki Aadhaar Act 2016 Section-7 dak ajemdaker DBT aser AePS amshia subsidies/benefits agütsüba dak rangloker jembia liasü. Parnokisa, Aadhaar authentication facilities ya Aadhaar Act 2016 Section 4(4)(b)(ii) dak ajemdaker good governance atema entities balalai amshitetsü, ta ashi.

Office of the Commissioner Nagaland ADC, Benjamin Longkap-i, state nung Aadhaar enrolment inyakyim indang metetdaksü. Iba sentong ya Director, UIDAI, Regional Office Guwahati, Kapil Jambhulkar-i tepela o jembir tembanga liasü.



Dimapur, Tsüklai/February 21: Fazl Ali College, Mokokchung nung aliba Department of Ao ajanga alima nung tetsü oshi anogo (International Mother Language Day) bilemteta essay competition ka ayongzükä liasü. Sentong nung shilem agirtem nem tetsü oshi tajungba nung angazükdaksütsü aser angatetdaksütsü nükjidong nung iba sentong ya ayongzükä liasü.

Nagaland Angh-i L Khumo asükhu lemsatop

Dimapur, Tsüklai/February 21 (TYO): Taoba mapang Nagaland Legislative Assembly nung züngsem aser Advisor inyaka alisang L. Khumo ajungbena February 20, 2024 nü Dimapur nung asüba atema jashir, ta Nagaland Angh, La Ganesan-i sangdong ka ajanga ashi.

Asür L. Khumo ya kanga ajemalur aser teindang lenir ka liasü, shibai nüburtem ajungtsü atema meranga inyak. Pai Nagaland nung aliba nüburtem

asoshi mapa tajung inyakba bilemtetsü. Pa asüba ya State asoshi temulung agüja aser bendanga agütsür tenzükba lenir ka samaogo, ta ashi.

Nagaland nung aliba nüburtem aser kü tenüng nung mangyimer kibong den asükhu lemsateper. Tulusang

Tsüngremi nenok nem tashi tasen agütsütsü aser asür tanüla tesunep nung anisingzüktsü sarasademtsür, ta Nagaland Angh ajangasa ashi.

DIET ajanga Avakhun nung NEP 2020 indang training agütsü

Dimapur, Tsüklai/February 21 (TYO): District Institute of Education and Training (DIET) Pfutsero ajanga February 21, 2024 nü Meluri division, Phek district kübok Phokhungri area nung Burma den arütsüa aliba Avakhun village (International Trade Centre) nung National Education Policy (NEP) 2020

indang training ka agüja liasü.

Iba sentong ya Bedukho Chuzho, Senior Lecturer lenisüba kübok agi aser Principal Atula Wai ajanga iba training ayongzükba nükjidong lemsatepa liasü.

Iba sentong nung shisalen sayurtem ya Soni Katiry, Senior Lecturer, aser Zaveta Kotso, Senior Lecturer liasü.



Mokokchung, February/Tsüklai 21(TYO): Alima ajunga tetsü oshi anogo amongba nüngtem nung Mokokchung Compound Baptist Arogo nunga tetsü oshi sentong temeja ka Arogo-i ayongzükä akaba nung Ao Riju Co-Ordinator Wb.I.Temjen Tzüdir(abelen nungi pungobuba) ajanga "Tetsü Oshi Terenlok" ta asüba onük nung ajemdaker jembi aser sentong temer kelen Arogo tenzük, onük jembir aser sentong nung shilem agirtem külemi tangokba noksa nung angur

Mejangjaba nisung tasü mang ana nguteta lir

Dimapur, Tsüklai/February 21 (TYO): Mejangjaba nisung ka Old NST Station, Dimapur anasa flyover bridge tsünglanglen süa aliba ngutet ta nüburtemi February 21, 2024 anepdang 8:20 ako meta East Police Station, Dimapur dang telephone ajanga osang agüja liasü.

telephone ka ajanga mejangjaba non-local nisung tasü mang ka Dimapur nung aliba railway track tekalen new flyover indang tetsüng lenmang nung ngutet ta Police Control room dangi osang aru.

Osang angazükli duty nung alirtem iba tesemi ao aser non-local tebur arishi küm 65 shi tain ka yangji süa aliba angu.

Osang angazükba sülen duty nung alirtem iba tasü mang aliba tesemi ao aser yangji arishi küm 50-60 shi tain tebur ka süa aliba ngutet.

Iba nisungba asüba nung temulung malemtsü kecha mongutet. Ozüng agi melaba ama maparen ajak tembangba sülen tasü mang ya PM examination/identification atema District Hospital Dimapur Morgue nung yua lir, ta Dy. Commissioner of Police (Crime)/PRO, Dimapur sangdong ka ajanga ashi.

Tasü mang nung yiruba kecha meliasü aser iba nisungba ya shiranga asüba asütsü ta temulung melemi lir.

Kibur/kinunger/tembar temi Officer-in-Charge, East PS Dimapur (Contact no.7085055020) den tongteprateptsü akok ta sangdong ajanga ashi.

Ozüng agi melaba maparen ajak tembangba sülen PM examination/identification atema tasü mang ya District Hospital Morgue nung bener oa lir.

Maneni February 21, 2024 anepdang 10:49 ako meta

Iba nisungba ya aut sentsü tammang coat ka, T-shirt sentsü temesüng, half pant temeren, moja temoro aser camo boots semer liasü.

Kibur/kinunger/tembar temi Officer-in-Charge, East PS Dimapur (Contact no.7085055020) den tongteprateptsü akok ta sangdong ajangasa ashi.

India-Greece na shishilembaba anasü agi tali akümtsü: PM Modi



February 21, 2024 nü New Delhi nung Ato kilonser Narendra Modi, Greece Ato kilonser Kyriakos Mitsotakis aser pa kinüngtsü Mareva Grabowski-Mitsotaki nunger Rashtrapati Bhavan nung agizükdang tangokba noksa nung angur.

New Delhi, Tsüklai/February 21 (Agencies): Bodhbarnü Ato kilonser Narendra Modi-i, Greece Ato kilonser Kyriakos Mitsotakis-i India semdangba ajanga linük ana tsüngda asalentong tsütsü tesendaktep tashi itshitsü, ta metetdaksü.

Modi-i, India aser Greece na tsüngda defence aser security sectors na nung amalitepa inyakba ajanga linük ana tsüngda kati ka dak melung lemtetba sayur, ta ashi.

New Delhi nung lenir ana leniba nung ketdangsertem senden amenba sülen tenati külemi osangbenertem den jembiba mapang nung Modi-i, "2030 küm tashi nungbo linük ana tsüngda shishilembaba anasü agi teimba akümtsü atema linük anapronglai bangjemogo. PM Kyriakos Mitsotakis aser pai aniba ketdangsertem ni India nung

pela agizüker. Yaküm ni Greece semdangba sülen tang pai India semdangba ajanga linük ana tsüngda tesendaktep tashi itshiba temaitsü sayur. Greek nunger Ato kilonser kati küm 16 sülen tang India semdangba ya putiotsü ka asütsü," ta ashi.

Linük anaprong nungi ketdangsertem senden nungji External Affairs Minister S Jaishankar, Union Minister of State for External Affairs Meenakashi Lekhi, National Security Advisor Ajit Doval aser Foreign Secretary Vinay Kwatra nungera densema liasü.

Modi-i, senden nung aluyimba, pharma, medical devices, technologies, innovation, skill development aser space sector nung amalitepa inyaksü atema maongka aika jangjaogo, ta ashi. Paisa, kiralongra anema

raraba tsütsü India aser Greece na kasa tebilemtsü aser kasa tangatetba lir, ta metetdaksü.

India aser Grece nati defence aser security tsütsü amalitepa inyaksü atema Working Group ka tentetba dak sendakba nung Modi-i, "Defence aser security tsütsü amalitep jenjang tajungba akümba ajanga linük kati ka dak temelung lemtetba sayur. Iba atema Working Group ka tentetba ajanga asenoki defence, cyber security, kiralongra aser maritime security atema taliba amalitepa inyaktetsü," ta metetdaksü

"Onoki tekaratiba nung linük ana tsüngda Migration & Mobility Partnership tsütsü tezüngzüktep renemtsü atema jembio. Iba tezüngzüktep agiba ajanga asen linük ana nung nüburtem tsüngda tesendaktep tashi itshitsü," ta paisa shisem.

India-China Corps Commander level senden amen

New Delhi, February 21 (Agencies): India-China Corps Commander level senden 21buba Chushul-Moldo border nung menogo, ta ketdangsertemi metetdaksü.

India-China Corps Commander Level senden nungji tamalen senden nung jembiba onüktem nung ajemdaker o lemtep aser anüdoklen Ladakh kübok Line of Actual Control (LAC) nung tanüngba tesemtem nungia sepaitem ajak aienshitsü atema

jembi. India-China arrtsülen tesünep alitsü atema LAC nung tanüngba tesemtem nungi linük anaprongla nungi sepaitem aienshitsü nungdak, ta telok anapronglai bangjemogo.

Kasa senden nungji linük anapronglai sepaitem aser ketdangsertemi maneni tongtepratepa alitsü aser arrtsülen tesünep alitsü atema bangjem.

Yaküm October ita nung India-China Corps

Commander Level senden 20buba amenba mapang nung India-i timtem adokba point ana- Depsang aser Demchok na nung mangatetep ken o ajak bentettsü atema benoka liasü.

2020 küm linük anati Corps Commander-level senden tenzükba sülen timtem adokba points pongu- Galwan, north & south banks of Pangong Tso, Patrolling Points (PP) 15 aser Gogra-Hot Springs area nungibo sepaitem aienshiogo.

Aluyimertemi sorkar dang Delhi nung longkak aittsü temelaba meshir

New Delhi, February 21 (Agencies): Bodhbarnü aluyimertem lenir, Sarwan Singh Pandher-i, linük temzüng kümzüksüji Ato kilonser teinyaksü mapa lir aser tesünep nung longkak aittsü atema aluyimertem dak temeden lir, ta metetdaksü. 'Delhi Chalo' march tenzüksü lia osangbener den jembidang Pandher-i, Ato kilonseri aluyimertemi akhangba onüktem ataloktsütsüla aser aluyimertem Delhi-i oa longkak aittsü atema temelaba agütsütsüla, ta ashi.

Paisa, sorkar atema sen 1.2 lakh crore mesüra 2 lakh crore ji sen aika masü, ta ashi.

Ano aluyimertem lenirsa, Jagjit Singh Dallewal-i, aluyimertem nükjidongji tensa raksatsütsü atema masü, anungji aluyimertem longkak aita Delhi telungi aiba

menokdangtsüla, ta ashi. Amongnü aluyimer lenirtem aser sorkar tenüng nung union minister tem tsüngda senden pezübuba mena liasü, ajisüaka iba senden nungji telemtetba kecha magitet.

Amongnü senden nungji Commerce & Agriculture Minister Piyush Goyal, Agriculture Minister Arjun Munda aser Minister of State for Home Affairs Nityanand Rai nungeri aluyimer lenirtem den o lemtepa liasü. Kasa senden nungji Punjab Chief Minister Bhagwant Mann aser aluyimer union balala nungi lenirtemi shilem agi.

Senden ghonda trok shi amenba mapang nung sorkari taruba küm pongu tashi alu nungi züsentedba chiyungtsü kar nung MSP (Minimum Support Price) agütsütsü benoka liasü, ajisüaka aluyimertemi ibaji magizük.



February 21, 2024 nü Patiala district kübok Punjab-Haryana Shambhu arrtsü anasa aluyimertem longkak aيتدang parnok senshidaktsütsü atema tear gas khaloktsüba ajanga parnok jenshidang tangokba noksa nung angur. Punjab aser Haryana arrtsülen aluyimertemi maneni asentenshir Bodhbar nungi longkak aitter.

Uttar Pradesh nung SP aser Congress na tsüngda menden lemsaogo

New Delhi, February 21 (Agencies): Taruba Lok Sabha election atema Uttar Pradesh nung Samajwadi Party Tir, Akhilesh Yadav-i Congress den lokteper tokteptsü sangdongba sülen SP lenir, Ravidas Mehrotra-i iba dak sendakba osang tejangja metetdaksü.

Uttar Pradesh nung Lok Sabha menden 80 lir.

Mehrotra-i, Uttar Pradesh nung Samajwadi Party-i Lok Sabha menden 63 nungi tokteptsü aser tanüngba menden 17 nungji Congress-i tokteptsü, ta metetdaksü.

Bodhbarnü osangbener den jembidang Mehrotra-i, "Samajwadi Party aser Congress nati Lok Sabha elections nung lokteper tokteptsü. Iba ya ajanga INDIA teloktep tashi itshitsü aser 2024 küm INDIA-i sorkar akümtsü. Opposition party temi iba election nung longjemer tokteptsü. BJP nem magütsüba votes melemsatsü atema onoki merangogo," ta metetdaksü.

"Samajwadi Party-i menden 63 nung tokteptsü aser Congress-i menden 17 nung tokteptsü. Onoki Uttar Pradesh nung menden 80 prongla nung takok angutsü atema merangtsü," ta paisa metetdaksü.

Samajwadi Party lenirsa, BJP-i aniba Central sorkari Enforcement Directorate (ED) aser Central Bureau of Investigation (CBI) ama central agencies tim mesüi amshir, ta aitsü.

Bodhbarnü Congress general secretary, Priyanka Gandhi Vadra-i phone ajanga Samajwadi Party Tir, Akhilesh Yadav den jembidang tekeraba nung menden lemsatsü atema jembia liasü.

Congress-i Samajwadi Party dang akhangba ama party-i Sitapur aser Barabanki menden nungi tokteptsü. Iba dak alia Congress-i Kanpur, Varanasi, Saharanpur, Amroha, Fatehpur Sikri aser Jhansi mendentem nungi tokteptsü.

Moradabad division kübok Congress-i parnok nem menden ana agüjang, ta mepishi saka parnok nem Amroha menden dang agütsü.

Anogo ishika tejaklen Akhilesh Yadav-i, Uttar Pradesh nung Congress-i menden 17 nungji tokteptsü melung nung ang Samajwadi Party-i Rahul Gandhi indang Bharat Jodo Nyay Yatra nung shilem agitsü, ta metetdakja liasü. Mongolbarnü Rahul Gandhi-i Raebareli nung iba yatra agiogo saka Yadav-i shilem magi.



February 21, 2024 nü Vigyan Bhawan, New Delhi nung Union Finance Minister Nirmala Sitharaman, Reserve Bank of India (RBI) Governor Shaktikanta Das aser Union Minister of State for Finance Bhagwat Karad nunger Financial Stability & Development Council senden nung adendang tangokba noksa nung angur.



TIR YIMYIM YIMOBILEM (EDITORIAL)

DIMAPUR YANGTEPNÜ, FEBRUARY (TSÜKLAI) 22, 2024

Mokokchung atema anogo tajung

Taküm küm tenzüker Mokokchung district asoshi anogo tajungtibaji yakanü February 19 nü ya asütsüsa temoatsü yatetdak tesem ana mesemetba angur. Kaji government mapa nung tongti shilem agia nübortem tenzüknertem asoshi NPSC aser NSSB tatidang agütsütsü purtem asoshi renemshidak "Shisalen Riju" tenzüka ya asütsü aser kaji 'Peoples College, Mokokchung' tesem tuluba aser tesademba nung tajungba küma lapoktsü asoshi tesem tasen ka yatetbaji asütsü. Anapronglaji, tarutsü asen lima aser asen nübortem junga lia odaktsünüba nükjidong nung inyakba mapatem lir. Idakji yimkong atema kibong ishika meyong rongsen aser nebo aika tenla agütsütsüsa adoktsü. Atangji, Shisalen Riju yabo Mokokchung District Planning & Development nung adener yimsüsür aser ketdangsertemi apiteta inyaktsü mulungtetba sentong ka lir, anungji yangji asenok ajak dena lir. Ibai Mokokchung district nung azünger aser alir lanurtem asoshi kanga nungdakba riju ka asütsü. Asenoki metettsüba kaji, government mapai aitsü atema renemtsüba ya tazungtsü tashi zünger, graduate mesüra post graduate ser dang renemer masü saka tazungdangyongi renemer. Ajisüaka, asenokbo züngzüker külen dang aritepa kakat kar bushia azünger mesüra osangkaketteama azungtsü tenzüker aser ano aritepa coaching center kar bushia oa renemshir. Iba jagi, asenoka junger ser nung tangar memeneper. Anungji, iba nungdakji angateta tan lapoktsüba Shisalen Riju nungjibo government mapai aitsü tebilemba alirtembo, pei tazungtsü tashi züngzük matai mezüngzük dang yongi oagi tenüng züluoka renemshitsü junger. Aji oda, iba Shisalen Riju ketdangsertemia iba nungdakji angateta kaketshirtem tezüngdak purtema tejangrartembo anioka renemtsütsü sentong ali nung ajungtsü. Tangarbo government mapai aitsü nükjidong alirtem dang masü saka technical züngnertem NEET aser JEE tatidang agütsütsü asoshia high school matongdangyongi renemer. Itemjibo school aser college azüngbajibo degree aser certificate atema dang azünger, anungji kar kaketriju kar nung tenüng züluoka yur kaketriju jagibo maor saka tatidang dang agütsür saka NEET mesüra JEE agütsütsüba nungji dang temulung agüja bushir aser takokerbo Coaching center nung alir. Ano, karbo degree aser certificate atema Open school nung dang azünger. Asenokibo züzüa bilemstüa akok saka Open School-tem lapokba ya item asoshiji kanga tongtibang kümogo. Item ajakji kodang bilemdangdir, tang asenok meyong Shisalen Riju tarutsü atema lanurtem arangshidak kanga mazungba tesem ka akümtsü. Iba nungji Mokokchung nung alirtem dang masü saka tangalen alir Civil Servant-tema mapang mapang shia jaoka yaridaktsütsü imlar. Iba denji kasa tesemji tajangzük aika keta amshitetsü atema Mokokchung DPDB-isa ano 'Skilling Riju'-a dena kümdaktsütetsü. Iba denji külemi ano Mokokchung nung lanurtem tashitemetet akümdak riju People's College tesem tesademba aser tajungba ka nung amenoktsü asoshi tenla tulu agüja tesem tasen yatetba ya nübortem asoshi asen lenir Metsübui tenla tulu agütsür asütsü. Nisung asoshi rongsen aser tashi tulutibaji tashitemetet ya lir. Iba jagi tashitemeteter akümtsü atema senotsü aika endoka bendanglen kaketriju tajung bushia azünger. Tanü asenok kibong shiai asen nungdakba nung senotsü teimtiba endokbaji tashitemeteter akümtsü asoshi bendanglen kaketshisatsü bushiba nung endoker. Ibai tsürabur aika asoshi shisabolu khuret tulu akümer. Iba timtem jagi tanur techira aser tajung aika tashitemetet mekümtetsüsa mezüngtet anener. Iba shisabolu, timtem aser takoksaji asen lima nung, angati mesüaka, jenjang dalang agi azüngtsüsa kaketreju tajung aka nung dang koktettsü. Iba nungdakji memenui People's College, Mokokchung ajanga ataloktsütsü imlar. Item rijutem mesemetetba ya, atangji, Mokokchung district asoshi anogo tajung ka tenzüker südakjangma.

OLEMSABANG

KISET SHIRURUMESÜBANUNG TANGAZÜKTSÜ

~ Dr. Merennungba

Asen tsürapur mapang nungi kiset shiruru mesüba ya sobaliba nung aketba mapa ka lir. Asen limai Christian

yimsü marudang tsüraburi Tsüngrem balala kümlama aru. Tatishitsü agi Lijaba Tsüngrem, Alu Tsüngrem, Süng, Long,

Tzü Tsüngrem etc. Item Tsüngrem balala külemdang kiset shiruru tepseta tenla agütsü. Ano shi achitsü atema mesüa aru.

Tanü kiset shiruru mesüba ya tongtibangsa rongsen lenmang bushiba nung rangloker mesür. Kiset shiruru rongnung Jang (buffalo) Nashi, Na bong aser patak (Duck) yabo kibong ajakibo memesür. Kechiaser item shiruru mesütsü asoshi ali aser tzü peria manguba den nübu nungdakar. Saka kibong ajaki mesüetba kiset shiruruji ak aser an lir. Item kiset shiruru tapu ana mesütsü atema tangazüktsü kar lemsateper.

AK mesüba (Pig rearing) - Ak ya tapu ana lir - Exotic breed aser Local/Indigenous Non-descript. Nagaland State ngur külen asen limai Exotic breed (Foreign breed) bener aruba tongtibang kar yamai angur.

Land race - Ibai temang tulu, tar talang tekep (Skin) sentsü tera temerem saka tezüng (hair) yabo temesüng (White).

Large White Yorkshire - Temang aser tar talang sentsü temesüng (White)

Middle White Yorkshire - Ibai temang tera tilaba, tar tatsüba, sentsü temesüng (White).

Hamshire - Temang tulu, tar talang, sentsü tanak aser tapubang anasa temang mekuta sentsü temesüng agi mekuta temtanga lir.

Berkshire - Temang tulu aser tar talang, sentsü temeru.

Doroc - Temang tulu, talang aser tejak tatsü den tepang tekirak.

Exotic breed ya asen lima mopung den kangapo meputep, anepalatsü tasak aser shi tachitsü asen nisungi kangabo mesapu. Anungji iba Exotic breed ya asen lima mali amai bilemer. Local/Indigenous/Non-descript ya akidang nungi asen tsürapuri mesüa aru. Iba ya temang tila, tar tatsü sentsü tanak (black) lir. Iba ya aintsü tasak (Slow in growth rate compare with Exotic breeds). Khen mepudang techanu ishishi dang mepur. Anungji rongsen lenmang tsütsü mesütsü jangra matem. Tanü asen lima mopung den apetba aser tashitak agi kangabo kara-a metongi koktetba AK ya Exotic breeds asen Local AK den cross süa mepuba koba dang cross-breed ta ajar ibai tajungtiba rongnung ka lir. Iba cross-breed tangar dang nungi temang ainba nung 5-15% tekaraba ainer (efficiency of feed conversion is 5-15% more than other breeds). Shi tachitsü tanang (taste) techanu ter pungo (15 nos) tashi khen nung meputsü akok aser mesüba yimya shitak süra küm nung anaben tashi meputsü. Anungji AK mesütsü jangrar asoshi tajangzük ngua mesütsü lenmang kar yamai tuyur.

1. Shiruru ajak nisung alidak nungi 100 metres shi pilar-ang mesütsüla. Tashitak kar lir, koba dang zoonotic disease ta ajar. Iba tashitak ya nisung O shiruru tsüngda menateper. Anungji shia aliba tetsüngda ji yur mesütsüla.
2. Kokra ak kodanga ali tesa nung memesütsüla. Scü aser natzü (faeces & Urine) ali tesa nung entokba yagi teshinem atoktsü aser ibai ajanga mesen tapu balala poktettsü aser shirangtsü. Talisa teküp nung lia azü ajemba ajanga adoker (Skin diseases through infection by ticks and lice etc.). Ano merila aser manga (mosquito & flies) pokteta tashitak-bener arutsü, iba den tsülai (earthworm) tapok yanglua ali temai atoka tashitak prokshitsü.
3. AK ki atemji (floor) cemented/concrete agi yanglutsüla anogo shia shiruru aser ki telung temeket merüka mozü agi merüktsüla (Disinfection by chemical agents such as phynol/Dettol, Lime Powder etc).
4. Techanu mepua mesür atema ki tesülen ali tilaka atsübanger ayutsüla aser anüngdang (day time) lapoka toktsütsüla. Ak tetsü ka asoshi 12ft x 12ft shi teperi alitsü. Ak tetsü ali (soil) mekung achiya agi la temang azü nung iron nungtakba peria angütsü. Techanu mepur anogo ishika tsüngda Ak chanu karbo tepoki oa aser tenük tereprangtsü wakong sentsü (yellow) amai akümtsü. Iba ya Piglet anemia tashitak asutsü akok. Iba tashitak ya tetsü mama (breast feeding) nung iron peria maliba ajanga techanu shiranger.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

ABAM Edu & Literature Ministry-i ayongzüka tetsü oshi terenlok sentong agi



Impur, February 21 (TYO): ABAM Education & Literature Ministry ajanga ayongzüka International Mother Language Day amongba den külemi "Tetsü Oshi Terenlok" sentong ka Impur nung kanga takok ngua agiogo, ta ABAM Executive Secretary, Rev. Dr. Mar Pongener-i sangdong ka ajanga metetdaksü.

Iba sentong nung ABAM staff, Ao Riju, Ao Kaketshir Mungdang (AKM) aser Aor Tsükong trok nungi lenirtem ajak agi nisung 60 shi arua iba sentong nung aden.

Tanü asen oshi samaa yokba ajanga asen ayak

samaa aoba tia aikati ajurudar aser iba ama dang asenoki libalirora, alima otsü nung oshi samaba rongnung asen Ao oshi ya yakta densemstü. Anungji, memenudang asenoki asen oshi taküm kümdaktsüra tarutsü putu nung ajaki metsünga reta Ao oshi amshitsü, ta nükla yur iba sentong agiogo.

Rev. Dr. Mar. Pongener, Executive Secretary, ABAM ajanga tajungshi O ashiba mapang nung, "Oshi aika metetbaji kanga senti aser tepelatsü, saka tetsü oshi nung tashi ka lir aser iba tashi ajanga dang asen ayak sayur. Ayak samara taküm nung

shilem tuluba ka mali akümer. Anungji, nisung ka ayak bentet-benteta ayutsü asoshi tetsü oshi meima benshitsüla," ta ajungshia liasü.

"Tetsü Oshi Jenjang Nung Lenir ka Shilem" aser "Tetsü Oshi Zülumen Lirumedem" onüktem Dr. Lanurenla, Principal, Sao Chang College, Tuensang aser Mr. I. Temjen Tzüdir, Coordinator, Ao Riju ajanga jembia liasü.

Tsüngremi asen Aor nem asen Tetsü Oshi meima benshitsü tangatetba agüja asen ayak jangja jangja sayuteta alima nung yimjung yanglur kin ka südakjang, ta sarasademer.

Yaküm US nung Tenla kitem amakba anasü agi teimba liasü: FRC

Nashville, February 21 (Agencies): Yaküm US nung Tenla kitem rongdoktsüba, raksatsüba mesüra Tenla kitem anema inyakba tatalokba 436 liasü, aser ibaji 2022 küm Tenla kitem anema inyakba dang nungi anasü agi teimba lir, ta Family Research Council (FRC)-i metetdaksü.

Nashville nung 2024 National Religious Broadcasters International Christian Media Convention nung FRC indang "Hostility Against Churches" report sangdonga liasü.

Yaküm US nung Tenla kitem anema inyakba tatalokba 436 ji 2018 küm den medemdangra tiben agi teimba lir, ta report nung shia lir.

Tenla ki rongdoktsüba mesüra raksatsüba tatalokbatem dak alia Tenla kidang prangpong amshiba aser bomb agi amokmerenba tatalokbatem-a densema lir.

Yaküm US kübok state 48 nung aser District of Columbia nung Tenla kitem anema inyakba tatalokbatem liasü; Hawaii aser Wyoming state na nung ang item ama

tatalokba maliasü. Tenla kitem anema inyakba tatalokba teimtibaji California (33) nung liasü aser tanabubaji Texas (tatalokba 28) liasü.

FCR report ajanga ashiba agi, yaküm US nung Tenla ki bensatsüba tatalokba 315 liasü, rongdoktsüba mesüra rongdoktsütsü merangba tatalokba 75 liasü, Tenla kidang prangpong amshiba tatalokba 10, bomb amshia amokmerenba 20 aser tanga tatalokba 37 liasü; item tatalokbaji yaküm January nungi November ita tashi nung atalokba liasü.

Yaküm June ita nung Annapolis, Maryland nung aliba Fowler United Methodist Arogo Tenla ki raksatsüba ajanga dollar sen 100,000 takoksa angu. Ozüing alema inyakerkem jagi Tenla kidang menden raksatsüba den külemi osangtajung ken kaketem aser Laishiba aika raksatsü. Parnokisa Kangki laodaktsü, Khristan wako raksatsü aser Tenla ki kikümbang raksaja liasü.

Taoba mapang U.S.

Commission on International Religious Freedom (USCIRF) nung chairman aser tang FRC Tir, Tony Perkins-i, "Bendanglen Khristantem reshikangshiba kanga bulua akümba aser yangia (US) Arogotem anema inyakba kanga bulua akümba na ya sendaktepa lir," ta ashi.

Kaket zülur aser Center for Religious Liberty nung director, Arielle Del Turco-i, Tenla kitem amakertem nukjidongji yimsü tsütsü amokmerentsü asoshi liasü, ta ashi.

Laisa, "Item ama tatalokba ajanga loktiliba nung Tenla kitem maginer mesüra akhüm metsübur lir ta kuli sayur. Khristan yimsü magizüktetba aser Khristan tamang mangizüktetba kanga bulua akümba sobaliba ka tenzüker," ta ashi.

"Item ama ozüing alema inyakba tatalokbatem liaka ajaki Tenla kitem aser tekülem agiba kitem akhümstübuttsüla aser America nunger senso ajak nem yimsü temeden agütsüba ya tongtibang ta züngshitsüla," ta laisa shisem.

ANOGO ABEN TSÜNGREM DEN

Tsüngremer tenangzükbatem au ta lir

Kechiaser Tsüngrem tenangzükbatem kwisüsa lildir ajak Khrista nung au ta lir. Anungji dang Tsüngrem sentsüwangshi atema onoki Khrista ajanga Amen ta ashir.

2 Korint 1:20

Tsüngremi Pa tenangzükbatem ajak ayur. Kodang asenoki Khrista den telungjem nung jajadir, Laishiba nung Tsüngremi nangzüka aliba ajak asenok den lir ta asenoki tejangja metet. Asenok taküm asoshi nangzüka akaba Laishiba nung bushitsü aser tenangzüka shiaji shisadangtsü asoshi Lai azüngtsü iba ochi yagi asenok ajungshidaktsütsüla.

Nenoki ni mulungba langka asüngdangra, nenoki kechi asüngdang aji ni agütsütsü ta Yisui nangzüka (Yn. 16:23b). Iba tenangzüka Khristan shia dang nangzüka. Nai Tsüngrem dang asüngdang iba tenangzüka ne taküm nung amshira Pa telangzübaji majangshira, iba jagi Tsüngremi ashiba memelenshir. Iba tenangzüka kechiba ne taküm nung mataloker ta nai Tsüngremer telangzüba bushitsü akok.

Pauli tenangzükbatemji pa taküm nung tendangogo aser tenangzüka ajakji kanga ochi ta pai kuli agütsü. Iba jagi pai Tsüngrem taochi talubusa Khrista nung asenok tsütsü takar aliba (Ef. 3:7) aser mejembitetba Khrista rongsen indang pai jembi (Ef. 38). Pauli Tsüngremer tenangzükbatem rongsen ngutet aser iba nung talubusa pelaa ali.

Ne taküm nung Tsüngrem tenangzükbatem ajunga matalokaka tasü meiti mesüra tataasa makai teli. Iba ochi tuluba renema akaba agizüktsü asoshi Tsüngremi ne taküm renemdaktsüner asütsü akok. Na Kibuba anasa jajaang, mapang nung ne taküm nung Pa tenangzüka nung süngjang atangba nai angutsü.

Gaza nung Muslim nunger aikati Khrista agizük

February 21, 2024: Tawa Saada-i, "Tang teraksatsüba Gaza Strip nung Muslim nunger jenti liaka Tsüngremi Gaza 200 dak temai pungmang nung nung Palestine nunger Yisu Khrista anguba sülen saaksalemtsü aser Khrista dak Khrista agizükogo, ta osang ka amangtsü atema sayatenya ajanga metetdaksü. inyaker, ta ni amanger," ta ashi.

Islam yimsü toktsür "Muslim nunger aikati Islam Khristan akümsang aser 'Once an Arafat Man' kaket zülusang, yimsü toktsür tanga yimsü agizüktsü atema lenmang Taysir Saada-i, "Tang Gaza bushir. Asentenshi tulu alitsü nung Israel den raraba mapang aser tamangertem aika nung Tsüngremi mapa akümsü ta ni amanger. Tanü inyakdar," ta ashi. iba ya atangji atalokdar," ta metetdaksü.

Taysir Saada ya mapang ka nungbo Palestine lenir Yassir Arafat den külemi inyaksemer ka liasü aser PLO (Palestine Liberation Organization) atema 'sniper' (meta talang nungi injang mezünga akar) ka liasü.

Interview ka nung jembidang Saada-i, "Mapang tatsüka tsüngda Gaza nunger 200-i Yisu Khrista nem taküm bendanga agütsü, kechiyong parnok pungmang aser mangdang nung parnoki Kibuba angu. Parnok tsüngda kasa p u n g m a n g - m a n g d a n g lemsatepba sülen parnok kati ka dak aziüta pelatepa liasü," ta metetdaksü.

Saada ya Gaza aser Middle East nung temeim mapa inyakba 'Seeds of Hope' organization tentetsang lir.

Widows and Orphans organization nung tongti, William Devlin-i, "Tang Gaza nung tensa kanga mejungi lir. Muslim nunger million 2.2 aliba Gaza nung Khristan nütsüng meyrjang ka shi dang anünga lir. Khristan 500 shi Greek Orthodox Arogo Tenla kidang aser 500 Roman Catholic Arogo Tenla kidang jenoka lir," ta metetdaksü.

Rara metenzükdang Devlin-i mapang shia Gaza semdanga liasü aser maneni pai Gaza semdangtsü atema maongka atar.

"Gaza nungertem timtem tensa ka nung aliba mapang nung parnoki pungmang-mangdang nung Kibuba Yisu angur," ta pai metetdaksü.

AO OSHI ANGAZÜKDAK:
TANÜ ANGAZÜKTSÜBA OJANG



Soloksora

(n) talila enoka jembiba, napasoa jembiba (exaggeration)

* Soloksora jembiba nisung aikati maginer.

Soma

(v) pu agi süng pakma (hewed)

* Merenbai süng temerang ka soma.

OLONG PAITEP # 6705

	1		2			3		4		5
6									7	
						8		9		
			10							
11										
						12				
13		14		15						16
17										18

TIPLIN

- 1. Inyaker ajangtetba
- 3. Bangsemo adokdak
- 6. Shitak mesüi inyak
- 7. Ya mimong nung angur
- 9. Reprangzük
- 10. Tasola
- 11. S _____
- 13. Yagi ajak ashioktsür
- 15. Ki aokba oset
- 17. Ak shi nung inokba tasen
- 18. Ishika

LANGTSÜNGLEN

- 1. Meshidak
- 2. Tanaben soshir
- 3. Iba anogo
- 4. Meshi
- 5. Yagi mi tsükloker
- 6. Shi tapu ka
- 8. Yagi ayimer saka ozü masü
- 9. Ajokba shiruru ka
- 12. Inyaktet
- 14. _____ hi
- 16. Akümüli nungi pilar

OLONG PAITEP # 6704 TELANGZÜBA

TIPLIN :

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen, 14. Ola,
- 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiooktsü,
- 5. Lenli, 7. Tajangzük, 11. teronem,
- 12. Sempa, 13. Jahaz.

NAI-A YA METETTER MA



Arishi küm 39 tain Denmark nunger kati shingaia meinyakdangba Guinness World Record (GWR) ka nguogo aser ibaji pa teni nung matchsticks 68 enokba lir. Peter von Tangen Buskov-i pa teni nung matchsticks teimtiba jangokba atema world record ngutetogo ta GWR website ajanga metetdaksü. Pa ya iba record yanglur mezüngbuba nisung lir ta GWR-isa ashi

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Myanmar arrtsü atsüdangba & FMR agienba anema lungkak ait



Aizawl, February 21, 2024 (Agencies): Mizoram NGO Coordination Committee (NGOCC)-i Bodbarnü India-Myanmar atsüdangtsüba aser Free Movement Regime (FMR) agientsüba anema lungkak aitogo. Mizo Zirlai Pawl (MZO) president H Lalthianghlina den NGOCC secretary Prof Malsawmliana nati anir lungkak aitba sentong agi.

Iba sentong nung Mizoram NGO Coordination Committee

(NGOCC)-i bangzüng ka renem aser ibaji "India sorkari Free Movement Regime (FMR) agientsü aser Indo-Myanmar arrtsü shibangtsü merangba magizüker" ta latet.

NGOCC-i Free Movement Regime (FMR) asentenshitsü aser Indo-Myanmar Border arrtsü shibangtsüba pusema nungiter ta parnokisa bangjemtep.

February 13 nü NGOCC-i Central YMA Committee

Room nung senden ka amendang India-Myanmar arrtsü shibangba aser Free Movement Regime (FMR) agienba anema lungkak aittsü lemetet.

NGO Coordination Committee nung Central Young Mizo Association (CYMA), Mizo Students' Union (MSU), Mizo Zirlai Pawl (MZO), MHIP (Mizo Women's Front) aser MUP (Mizo Elders Association) den tanga teloktem dena lir.

Meghalaya CM Conrad-i Inner Line Permit tenzüksü mepishir

Shillong, February 21, 2024 (Agencies): Citizenship Amendment Act (CAA) benokra ozüng alema arurtem prokshitsü anungji Meghalaya nung Inner Line Permit (ILP) tenzüksüla ta Meghalaya Chief Minister Conrad Sangma-i ashi.

"Citizenship law indang tebilemtsütem lemsatepogo ajisüaka Act mapa tenzükra Meghalaya nung ILP nungdaker mesüra iba mesükba inyakyim ka nungdaker. Northeast nungi ozüng alema arurtem jenshiba

nungi noktanga alitsüla" ta Meghalaya chief minister-i ashi.

Meghalaya-i Bangladesh den kilometre 400 tema agi arrtsütepa lir aser state nung alirtemi CAA anema noktak.

CAA nung Sixth Schedule areas madentsü aser iba ajanga Meghalaya nung tesem aika iba Act kübok madener ta CM Conrad-i ashi.

"CAA indang mezüngbuba draft yangludang state kecha nunga tesemtem medendaksütsü lateta maliasü. Onoki iba tebilemtsü

lemsatepba sülen onoki home minister den ajurutep, tanga lennirtem den ajurutep aser draft ajunga meyipa repringshi. Iba sülen parnoki Meghalaya aser tanga state tem nung sixth schedule aser ILP benoka aliba tesemtem medendaksütsü onük enoksem" ta Conrad Sangma-isa metetdaksü.

"Shillong nung square metres kar dak alaka Meghalaya nung tesem ajak scheduled area lir. Shillong nung European ward ta ser tesem tila ka non-schedule area lir" ta paisa ashi.

Assam Police-i drugs shibelener nisung 10 apu

Guwahati, February 21, 2024 (Agencies): Assam Police-i tesem balala nung mita aodang drugs shibelener nisung 10 apu.

Moirabari nung police-i Sirajul Islam, Siraj Ali aser Mustafa Alam nunger apu.

Assam police-i drugs enoka aliba containers 15, mobile

phone 2 aser Rs 13,500 anguba sülen par asem apu.

Police-isa maneni Moran Town, Dibrugarh nung bushitepa aodang Jitul Das aser Ankur Gogoi na apu. Tena ket nung heroin gram 23.62 bena liasü.

Guwahati City crime branch ketdangsurtemi Hatigaon aser

Basistha Police den külemi mita aodang drugs shibelener 5 apu.

Parnok rongnung Mohidul Islam, Nizamuddin aser Nuruza Begum nunger jangjaogo saka nisung ana tenüng temai madokdaksü lir.

Parnoki sapon pongdang 20 nung heroin aser packets 27 nung drugs bena aliba apu.



February 21, 2024 nü Natu La, East Sikkim nung ajungbena rü alaba ajanga gari 175 nung tourist 500 shi len tom nung anendaka lia Trishakti Corps sepaitemi tourists kümzüksü aser teyari agütsütsü mapa tenzük. TriShakti Corps, Indian Army sepaitemi tourist tem temang anepaluba aser chiyungtsü tatsüktalem agütsüba den parnok timtem kecha melii anir arua liasü.

US-i Russia nem tenokdangba talila agütsütsü renema lir

Washington, Tsüklai/February 21 (Agencies): Russia nunger opposition lenir Alexey Navalny asüba aser Ukraine nung küm ana tashi raraba dak sendakba nung United States-i Russia nem tenokdangba tasen agütsütsü atema renema lir.

National Security Council otongdar John Kirby-i ashiba agi, tenokdangba tesashi agütsütsü aliba ajanga Navalny dak kechi atalokogo iba khuret Russia nem bendaktsütsü aser iba ya Ukraine amak tenzüker küm ana ajungba atema telangzüba ka asütsü.

Mongolbarnü osangbertem den sensaksemba mapang US tir Joe Biden-i osang tejangja magütsü, saka ashiba agi, tenokdangba agütsütsü aliba indang osang talila Hokolbarnü agütsütsü. Russia-i Ukraine amak tenzüker küm ana ajungtsü lia tang iba tenokdangba agütsütsü renema lir.


Tenokdangba tasen agütsütsü ajanga Russia indang defence, industrial bases aser rongsenketzung atema sen aazükdak source tem densema tanga lenla balala dak kongshitsü, ta White House national security adviser Jake Sullivan-i ashi. US ketdangsur tejen kati ashiba agi, Ukraine amak

tenzüker küm ana ajungtsü lia tenokdangba agütsütsü atema sentong yangluatokogo, koba tang Washington-i asadangshia Putin anemer rongnung tongtiba asüba atema telangzüba densema agütsütsü.

Russia nunger ketdangsurtemi ashiba agi, arishi küm 47 tain Navalny February 16 nü Arctic Circle penal colony north nung ajungbena asüba kuli tang tashi monguteti lir. Pa asüba bushisingdangba mapang tasümgang ya taruba hopta ana tashi magütsütsü ta shiogo, ta Navalny indang team-i metetdaktsü.

(Maneni tapak 8 nung...)

Menungra Bilemteter



NUNGSANGNUNGLA JAMIR (MONGSENYIMTI)
22/02/2023

Temeim kinungtsü/Oja, nai onok doktsür orr küm rentetdang nü temeim aser nü tadenba onok mulung nung teti lir aser ibajagi onok mulung süngzüker. Na meli-i küm ka abensadang nü temeim mapa aser tsüngsü tajungtem bilemtetera menungraseta amonger.

Temeim Kinungbo, Jabaso & Kinungertem.

DEPARTMENT OF POWER, GOVERNMENT OF NAGALAND, KOHIMA

PRESS NOTE

PUBLIC NOTICE IN RESPECT OF

PETITION FOR APPROVAL OF ARR & TARIFF PROPOSAL FOR THE FY 2024-25

FILED BY

DEPARTMENT OF POWER, GOVT. OF NAGALAND BEFORE NAGALAND ELECTRICITY REGULATORY COMMISSION (NERC)

1. Notice is hereby given to all consumers and stake holders that the Department of Power, Government of Nagaland, a Deemed Licensee, has filed the Petition For approval of ARR & Tariff Proposal for the FY 2024-25 before the Nagaland Electricity Regulatory Commission (NERC), on 21-12-2023 under section 61, 62 & 64 of the Electricity Act 2003. The petition has been admitted by the Hon'ble Commission on 12.01.2024 and numbered as Petition No.01/2024-25. The same is as summarized hereunder:

Objections/Comments are invited from various stakeholders on Petition for Approval of ARR & Tariff Proposal for the FY 2024-25 by Department of Power, Government of Nagaland

Highlights of the ARR & Tariff Proposal for the FY 2024-25 submitted by Department of Power, Government of Nagaland.

Sr. No.	Particulars	FY 2024-25	
1	Annual Revenue Requirement		
i	Cost of power purchase (Rs. In Cr.)	474.13	
ii	Transmission Charges (Rs. In Cr.)	112.11	
iii	Total cost of power purchase (Rs. In Cr.) (i + ii)		586.24
iv	Cost of Generation (Rs. In Cr.)		16.13
v	Employee Expenses (Rs. In Cr.)	191.37	
vii	Repair & Maintenance Expenses (Rs. In Cr.)	19.38	
viii	Administration and General Expenses (Rs. In Cr.)	3.81	
viii	Total O & M Expenses (Rs. In Cr.) (v + vi + vii)		214.56
ix	Interest and finance charges (Rs. In Cr.)		0.00
x	Depreciation (Rs. In Cr.)		84.99
xi	Interest on working capital (Rs. In Cr.)		0.00
xii	Return on Equity (Rs. In Cr.)		0.00
xiii	Total Revenue Requirement (Rs. In Cr.) (iii + iv + viii + ix + x + xi + xii)		901.92
xiv	Less: Non-Tariff Income (Rs. In Cr.)		16.10
xv	Net Revenue Requirement (Rs. In Cr.) (xiii - xiv)		885.82

	Energy Charge (Rs./Kwh)
2 Annual Tariff Proposal (Post-paid)	
I CATEGORY 'A' DOMESTIC	
(a) 0 to 30 kwh	5.60
(b) 31 to 100 kwh	6.10
(c) 101 to 250 kwh	6.80
(d) > 250 kwh	7.45
II CATEGORY 'B' INDUSTRIAL	
(a) < 500 kwh	6.80
(b) 501 to 5000 kwh	7.35
(c) > 5000 kwh	7.85
III CATEGORY 'C' BULK	7.25
IV CATEGORY 'D' COMMERCIAL	
(a) < 60 kwh	7.75
(b) 61 to 240 kwh	9.00
(c) > 240 kwh	9.40
V CATEGORY 'E' P.W.W.	7.80
VI CATEGORY 'F' Public Light	To be recovered from consumers *
VII CATEGORY 'G' INTERSTATE	6.60
VIII CATEGORY 'H' AGRICULTURE	3.50
IX CATEGORY 'I' TEMPORARY CONNECTION	DLF Rs. 11.50 Others Rs. 14.50
X Kutir Jyoti (point)	Same as DLF
XI SINGLE POINT METERED RURAL	5.60
XII SINGLE POINT METERED URBAN	5.80

Charges for public lighting have to be recovered from the Consumers of Domestic, Commercial, Industrial and Bulk categories at the rates shown below:

Domestic	Rs. 10 per connection / month
Commercial	Rs. 15 per connection / month
Industrial	Rs. 20 per connection / month
Bulk Supply	Rs. 25 per connection / month

	Energy Charge (Rs./kwh)
3 Annual Tariff Proposal (Prepaid)	
I CATEGORY 'A' DOMESTIC	
All Units	5.75
II CATEGORY 'B' INDUSTRIAL	
All Units	6.75
III CATEGORY 'C' BULK	
All Units	7.00
IV CATEGORY 'D' COMMERCIAL	
All Units	8.60
V CATEGORY 'H' AGRICULTURE	
All Units	3.30

The Component of ARR & other parameters, proposed by Department of Power, Govt. of Nagaland may be increased, decreased or amended by NERC, even if not proposed by the licensee, to meet the requirements of Tariff Policy, Electricity Act and any decision by Hon'ble APTEL or Supreme Court on any Electricity related subject.

The Electricity consumers and other stake holders are invited to give written suggestions/objections/comments. Written suggestions/objections/ comments for Approval of ARR & Tariff Petition for the FY 2024-25 or any other aspect of the Petition limited to the specified subjects as above should be sent to "Deputy Director, NERC, Nr. E-n-C Office, Department of Power, A.G Colony, Kohima and a copy to the Chief Engineer (D&R), Department of Power, Government of Nagaland, Kohima-797001.

Copies of filings and application referred at above are available in the office of the Chief Engineer (D&R), Department of Power, Govt. of Nagaland, Kohima-797001. Interested parties may inspect / peruse the said MYT Petition and take note thereof during office hours at the office. Copies of the above documents can also be obtained from the above office on payment of Rs.200/-per copy of Petition in cash or through DD.

Suggestions in this regard may also be sent to nerc_kohima@yahoo.com and cepower1@gmail.com before 15-02-2024.

**Superintending Engineer (Rev),
Department of Power
Government of Nagaland, Kohima.**

Kibong kümer küm 50 ajungba Tenüngsang



Tsürabur Mr. Tali Imchen aser Mrs. Apokla Jamir
22nd feb 1974 - 22nd feb 2024

Temeim Oja, Aba, Tsüngrem temeim agi yatashi anir aru nung Pa tenüng asanger, ano arishi talang moajangma ta ozü sarasadem.

-Ner chirnurtem, in-laws aser semchirtem.

Pelaba Lemsateper



LATE. K. TALIAO (Chuchuyimlang)
Aso: 04.02.1970 - Asü: 18.02.2024

Onok-i teti meima aliba obala, pa manem-i aliba mapang nungi tasünü tashi nung shirnokisa ozü khuret ajak nung rongsen, nübu, shisatsü, sarasadem aser lenmang balala ajanga yaritepogo, ajak dang kanga pelaba lemsateper.

Tsüngrem-i nenok ajak nem tatem makai temoatsü agüjang ta ozü sarasadem.

*- Temeim Kinungtsü, Chirnur, Semchirsepmur,
Kinungertem aser Anükapang*

PML-N aser PPP nati Pakistan nung sorkar kumtettsü

Islamabad, Tsüklai/February 21 (Agencies): February 8 nü nung election agiba nung mangatetep aliba election agir menden timba nung takok ngua hopta ishika lir Pakistan Muslim League-Nawaz (PML-N) aser Pakistan Peoples Party (PPP) nati sorkar tasen ka kumtettsü Mongulbar aonung ayatirm nung pangjemtepogo.

PML-N yagi menden 75 nung takok angu aser PPP yagi menden 54 nung takok angu. Muttahida Qaumi Movement Pakistan (MQM-P) yagi parnok yaritsü mulungogo, shirnoki menden 17 nung takok ngua liasü. PML-N den danga party

tila pezü senteper menden 264 nung election agiba nung menden timba nung takok ngua liasü. Party tulutiba ana indang coalition ya Pakistan army-ia ya Pakistan Peoples Party (PPP) nati sorkar tasen ka kumtettsü Mongolia aonung ayatirm nung pangjemtepogo. PML-N yagi menden 75 nung takok angu aser PPP yagi menden 54 nung takok angu. Muttahida Qaumi Movement Pakistan (MQM-P) yagi parnok yaritsü mulungogo, shirnoki menden 17 nung takok ngua liasü. PML-N den danga party

(Maneni tapak 8 nung...)

Bayern aser coach Tuchel na season tembangba sülen pilatsü



Thomas Tuchel

Tsüklai/February 21, 2024 (Agencies): German club Bayern Munich aser German club Bayern Munich na season tembangba sülen pilatsü, ta Bundesliga champions yagi sangdong ka ajanga metetdaksü.

Tuchel den küm ka tejakdangang tenangzüktepba yanglu aser pa 2025 tashi inyaksü atema nangzükteper liasü, ajisüaka iba tenangzüktepba ya tang asaya aliba season sülen tembangtsü.

Bayern pur tetoktepba ajak nung taoba asaya asem tashi nung tamakok nguogo, kong league nung temaba jenjang nung aliba Bayer Leverkusen puri goal 3-0 agi akokba

Tuchel ya taoba mapang Borussia Dortmund aser Paris St Germain nunga inyakogo aser 2021 küm Chelsea nung inyaka aliba mapang Champions League ka dena kokogo. Pai ashiba agi, pa Munich nung tanungba mapang ya nükjidong tanungbatem aser Champions League dak rangloker inyaksü ta ashi.

Pa Bayern nung iba season ang tetenzük nungi inyaker, ajisüaka tongtibang asayatem aika yiruba ajanga tetsükdaksü tulu adokogo aser Bundesliga nung otsüsüsüsa Harry Kane alizükaka kecha balaka temelenshi madok.

"Season tembangba sülen pilatsü asoshi onok mulungtepogo. Iba mapang matong tashi ni kü indang coaching staff tem den takokba tashi takok angutsü atema inyaksü," ta Tuchel-i ashi.

Bayern pur taruba asaya RB Leipzig den asayatsü, shirnoki Munich nung taoba asaya ana nung Bayern koker lir.

Bayern puri 2011-12 küm dang tite ka danga mekoktet. Iba sülen parnoki Bundesliga titles 11 prongla benogo, German Cups, aser Champions Leagues ana tashi kokogo. Parnoki 2013 aser 2020 küm asayamung asemprongla koka liasü.

ICC Test rankings: Yashasvi Jaiswal top-20-i iogo



Yashasvi Jaiswal

New Delhi, Tsüklai/February 21, 2024 (Agencies): Indian opener Yashasvi Jaiswal, tawa sayaba ICC Test rankings nung jenjang 14 tejakdangi tua tang 15buba tongtetogo.

England den asaya aliba Test asayamung nung pai asaya ana atonga double century yangluba sülen pa rankings nung tejakdangi tuogo. Arishi küm 22 tain Jaiswal ya iba alizüing tongtetba asayar tibuba kümogo aser pa India nung Vinod Kambli aser Virat Kohli na sülen asaya ana atonga double century yangluba tasembuba asayar kümogo.

Maneni pai bowling-a kanga junga aonba sülen bowling rankings nung pa tang trokbuba nung lir.

Visakhapatnam nung tanabuba Test asayaba mapang Jaiswal-i mezüngbuba innings

spinner Ravichandran Ashwin, shiba Rajkot nung asayaba mapang Test asaya nung wicket 500buba agia liasü pa bowler tem rongnung tanabubai tuogo aser pa Jasprit Bumrah sülen lir.

Test all-rounders rankings nung Jadeja aser Ashwin na mezüngbuba aser tanabuba jenjang nung lir.

Batter tem rongnung India captain Rohit Sharma-ia Rajkot nung mezüngbuba innings nung run 131 yangluba sülen pa jenjang ka tejakdangi tua tang 12buba nung lir.

England nung asayatem rongnung opener Ben Duckett-a jenjang 12 tejakdangi tua tang 13buba nung lir. Pai Rajkot nung mezüngbuba innings nung run 153 yangluba liasü.

Batter tem rongnung New Zealand nung asayar Kane Williamson maneni temaba jenjang nung lir aser South Africa den asayaba mapa century ka yangluba sülen pa jenjang tajungba kuma yanglushiogo.

Batter tem rongnung Williamson sülen Steve Smith aser Daryl Mitchell na lir.

BENDANGLI OSANG : Tapak 7 nungi...

US-i Russia nem tenokdangba talila...

Mongolbarnü Navalny tetsü Lyudmila Navalnaya-i Putin dang par jabaso tasü mang tangsa tang agütsüsü asoshi mepeshia asüngdangogo, ajita asünung dang lai pa tasü mang remtettsü.

Kasa takhangba ya Navalnaya kinungtsü Yulia Navalnaya-ia agütsüogo, shibai taoba mapang video ka ajanga, ketdangsurtemi tasü mang tang tashi magütsü lir, kechiyong parnok pa tasü mang nungi Novichok nerve agent asemshia aoba atadar, ta ashi.

Kasa mapang nung European Union-i Navalny asüba dak sendakba nung Russia indang charge d'affaires jaokogo aser Belgium, France, Germany, Italy aser Poland nungeri Russia indang ambassador jaokogo.

Secretary for terrorism and financial intelligence kübok US Treasury, Brian Nelson-i iba hopta Europe semdangba mapang Navalny asüba dak sendakba nung tenokdangba agütsüsü atema sensaksemogo, ta Reuters news agency sangdong ka ajanga metetdaksü.

Nelson-i Germany, Belgium

asere France semdangba mapang Russia-i rara dang amshiba oset yanglutsü atema senotsü agütsürtem tanga linük ka nung liaka parnok nema tenokdangba agütsüsü asoshi sensaksemogo, ta Treasury-i ashiba den, tenokdangba agütsü aliba paitoktsü merangertem Washington-i bushidar, ta shisem.

Policy experts temi Ukraine amaktsü atema senotsü nüngdaka aliba nokdangtsü atema sentong balala benokdangogo, kong nation's Central Bank fund sota ayutsüba, koba Europe nung timba yua lir aser iba den Russia indang totzü price cap ajemtsüsüba densema lir.

Council on Foreign Relations nung fellow Charles Kupchan-i ashiba agi, "tenokdangba agütsüsüba renema dang lir ajisüaka kwika benokaka aji teperi masütsü, kechiyong tenokdangba balala agütsüba ajanga Russia rongsenketzung dak kecha balaka mekongshi."

"Temelenshiji Ukraine nem military aser senotsü teyari magütsüba ajanga dang adoktsü," ta pai shisem.

PML-N aser PPP nati Pakistan nung sorkar kumtettsü

Mongulbar ayatirm nung osangbener den jembidang PML-N tir Shehbaz Sharif ya maneni ato kilonser inyaksü, ta PPP Chairman Bilawal Bhutto-Zardari-i sangdong.

PPP indang co-chairman aser arishi küm 68 tain Asif Zardari ya maneni linük indang tir akumtsü. "PPP aser PML-N ajanga nüngdakba menden ngutetogo aser tang onoki sorkar ka kumtettsü jenjang nung lir," ta Bilawal-i osangbener dang ashi.

Taoba mapang ato kilonser inyaka alisang Imran Khan'er Pakistan Tehreek-e-Insaf party-i yariba candidates aser Sunni Ittehad Council (SIC) ajanga Centre nung sorkar ka kumtettsü atema Parliament nung nüngdakba simple majority mongutet ta pai ashi.

Nütsüing yongsük million 241 aliba linük nung sorkar ka kumtettsü menuba ajanga nüburtemi khuret bena liasü, kechiaser Pakistan nung rongsenketzung tsütsü timtem ajurua lir aser telungpuri azüdokshi agütsüba tali akumer, aser teletetba tesashi agitsü atema sorkar tajung ka nungdaker.

Osangbener den jembidang arishi küm 72 tain Shehbaz-i ashiba agi, parnoki PTI dang Centre nung par sorkar kumtettsü ashi saka parnoki nüngdakba menden 169 mongutet.

2022 nungi 2023 tashi ato kilonser inyaksang Shehbaz-i ashiba agi, PTI-i sorkar kumtettsü teletetba agi asübo PML-N aser allied party tem opposition menden nung amentsü renema liasü.

Par PML-N ya tangbo PPP den lungjemer sorkar kumtettsü jenjang nung lir ta ashi. Party ana ya lungjemtsü kanga tongtipang aser Centre nung sorkar kumtettsü jenjang nung lir, ta taoba ato kilonseri nenshia ashi.

February 8 nü elections agiba sülen sen nüngdaka aliba linük nung hung parliament ajurua lia iba sangdong ya agütsü. Arishi küm 71 tain Imran Khan'er Pakistan Tehreek-e-Insaf party-i yariba independent candidate 93-i National Assembly menden nung takok angu. Independent candidate aika PML-N dangi aor ta Pakistan nung osang balala ajanga ashir.

Imran Khan'er PTI ajanga X nung post ka agütsüba nung PPP aser PML-N alliance 'PDM 2.0' ya aija liasü. "PDM 2.0 = #MandateThieves" ta PTI-i ashi.

Hombarnüa party ana tsünga senden mena coalition sorkar kumtettsü asoshi jembiba nung tangatetep kati maruteti liasü.

Sorkar tasenba asoshi lenmang temela masütsü saka tetsükdaksü jenti alitsü, ta Shehbaz Sharif-i ashi.

BILEMDANGANG

"Mapa tasen ka inyakdangtsü asoshi kodanga kecha temeno mali."